

Sanhgyangh:

Vwnzva Lijyouz Dauqfuk Yiengh Hoengh

5 nyied 13 hauh, Sanhgyangh Dungcuz Swciyen Liengzgouj Yangh gingjih angqyangz coux hek, gyoengq vunzmbanj dangdieg yungh dubceiz、diuq dohyez caeuq biujyienj minzsug ciengqgo diuqfoux daengj cietmoeg caeuq hekyouz gikcingz doengz angq, langhbaij mbanjranz Dungcuz lai saek lai yiengh. Bineix, Sanhgyangh vwnzva lijyouz bouhmonz cizgiz wngqdoiq binghraq “daihgauj”, doenggvaq lai cungj banhfap, gikfat gij rengzhoengh aen hawciengz lijyouz, gaenxmaenx coicaenh Dungcuz vwnzva lijyouz canjnieb hoizfuk dauq ndei.

(Gungh Bujganh/龚普康 Lungz Gyahcen/龙佳倩)



► Mehmbwk Dungcuz youq ndaw gingjih diuqfoux.



▲ Vunzmbanj Dungcuz langhbaij nda Dungcuz.

Yungzsuij:Mbanj Yauz-cuz Huqdoj Lairaeuh

5 nyied 12 hauh, Yungzsuij Myauzcuz Swciyen Dungzlen Yauzcuz Yangh gawjbanh daih’it gaiq “Mbanjyauz miz laex” minzcuz daegsaek banggunz canjbinj bingzsenj doxdax, gaenh bak cungj ndangdaenj、huqsan faexcuk caeuq huqdoj Mbanjyauz daengj banggunz canjbinj dangdieg miz Yauzcuz daegsaek haenx langhbaij yienghsiengq gyaendei, ciuyinx hekyouz lairaeuh.

(Lungz Dauh/龙涛)



▲ Mehmbwk Yauzcuz langhbaij gij doxgaiq cang gyaauj bawxmoq.

Lungzswng:Ndiepgyaez Mehmbwk Ndangcangq Banggunz

5 nyied 14 hauh, Lungzswng Gak Cuz Swciyen Swsuij Yangh Seizdaih Moq Vwnzmingz Sizcensoj cujciz aendoih mehmbwk gagnyienh fugsae, bae Banhnei Cunh guh aen cawjdaez hozdung goeng’ik “ndiepgyaez mehmbwk、ndangcangq banggunz”. Doihfugsae guh yivu yawjbingh、minzcuz vwnzva senhconz、louzsouj lwgnyez mehmbwk henhoh gienzik daengj hozdung, daezsang gij ndangcangq yisiz mehmbwk lajmbanj, demgiengz gvansim swhgeij、gvansim gyaranz gvaq saedcej cangqheiq caeuq veizgenz yisiz bonjfaenh.

(Vuz Swnghbinh/吴生斌 Cinz Hinghvaz/陈兴华)



▲ Bouxgagnyienh yiengq mehmbwk Yauzcuz dangdieg senhconz faplwd cihsiz.

Ningzmingz:Gingj Minz Caezsim Fuengzre Binghraq



▲ Dangjyenz gingjaz caeuq dangjyenz husw dauqungz guh haeuj dangj senhsi yizsi.

5 nyied 13 hauh, Ningzmingz Yen Dungzmenz Henzguk Baicuzsoj caeuq Dungzmenz Veiswnghyen lienzhab gawjhengz gaemfwngz fuengzre binghraq cawjdaez hozdung. Dungzmenz Cin diuz gyaiq henzguk raez 122 goengleix, dwg aen yanghcin Gvangjsih diuz sienq henzguk dieghawq ceiq raez haenx, fuengzre gij binghraq guetkrog cienz haeuj yinvu nanz naek. Fuengzre gaemhanh binghraq doxdaeuj, Dungzmenz Henzguk Baicuzsoj caeuq Dungzmenz Veiswnghyen doxbang、dox boiqhab, gyagiengz henzguk guenjhaed gihci, yiemzfuengz yiemzhanh bakgvan, cukmaenh diuz fuengzsiengq douguk, saedbauj henzguk itsienq an’onj.

(Couh Yizganh/周贻刚)